



Sonam Kapoor noksa German
Bollywood magazine nung amshi

Assam CM-i asür nem sen
lakh 6.5 teyari agütsü

Congress-i aniba opposition-i Tir candidate atema Meira Kumar shim



tem tenüing nung Brihostibarnü Congress Party Tir, Sonia Gandhi-i, taoba mapang Lok Sabha Speaker, Meira Kumar Tir election atema opposition candidate asütsü, ta sangdongogo.

Meira Kumar ya Bihar, Arrah district nungi lir, aser la ya Dalit lenir aser taoba mapang Deputy Prime Minister, Jagjivan Ram'er jala lir.

New Delhi, June 22 (Agencies): Opposition party

(Maneni tapak 12 nung...)

NSCN-IM teloki Nagaland merenlok daksüner: ACAUT

Dimapur, June 22 (TYO): NSCN-IM teloki Dimapur aser Kohima na tsüingda 4 lane lenmang yanglur contractor tem dang tax magütsüra parnok meyong machineries ajak rondoktsütsü ta amokmerenogo ta sangdongba osangji anogo asem nü tsüingda NSCN-IM teloki mejangjatsüra parnoki Nagaland nung terenlok mapa meinyakdaksüner asütsü ta ACAUT teloki June 18, 2017 nü metedakja liasü.

mejangjatsü nungji, parnoki Nagaland nung alirtem nem terenlok ajanga bener aruba temoatsü magidaksüner asütsü ta ACAUT teloki tanü sangdong ka ajanga metedaksüogo.

Tang nungibo 4 lane lenmang yanglurtem nem lenmang meyanglutetsüsa timtem agütsüra, ibajibo Naga nunger ajak anema inyakba mapa ka asütsü ta ACAUT telokisa metedaksü.

Ano, contractor-temia mapaji oset shitak amshia shitak inyaktsüla ta ACAUT telokisa metedaksü.

Ajisüaka, NSCN-IM teloki nübortemi metetnüba ama

DDADU-i ambulance service tenzüker



Dimapur, June 22, 2017: Brihostibarnü Dimapur nung Dimapur District Autorickshaw Drivers Union (DDADU)-i parnok indang office nung Ambulance vehicle tenzüksüba sentong nung Economics & Statistics Parliamentary Secretary, Tovihoto Ayemi, District Transport Officer, Lovikali Yeptho aser DDADU ketdangsertem tangokba noksa nung angur.

Dimapur, June 22 (TYO): Tanü Brehostibar nü yangi Dimapur nung Dimapur District Autorickshaw Drivers' Union (DDADU) meyong ambulance

service ka Parliamentary secretary for Economics & Statistics, Tovihoto Ayemi-i tenzüksüogo.

Wb.Tovihotoi iba mapa ya tenzüka jembidang, DADDU ajanga nübortem asoshi mapa tajung tenzüka asoshi tenüngsang agütsü aser state sorkari transportation system tajungba kati memelen tashibo nübortem senzusenpongtsü asoshi autorickshaw ya-ang tongtibang asütsü, anungji nübortem gari lendong nungi kümzüka anir jajatsübaji teti temulung nung yur senzütsüla, ta metedaksü.

Iba sentong nung DTO, Lovikali Yeptho-ia DDADU teloki nübortem asoshi teyari angutsüsa ambulance service tenzüka asoshi pelaba metedaksü.

Iba ambulance service ya jenjang dalang agi auto drivers aser kinungertem dang masü saka nübortem asoshia angutsü ta DDADU-i metedaksü.

Nagaland nung election timi agütsü atema yimten teloktemi nangzük



Brihostibarnü NBCC Platinum Hall, Kohima nung NBCC ketdangsertem aser Nagaland nung yimtenren party balala nungi lenirtem tangokba noksa nung angur.

Kohima, June 22 (TYO): Nagaland nung ochimashi mapatem ajak dera ya election lir, kechiyong election timi magitetba ajanga yimten nung ochishia meinyaketter, anungji 2018 küm agütsüba election yabo merükmerüka timi agütsü asoshi yimten telok ajaki Nagaland Baptist Church Council (NBCC) pusema nokdaksü, ta tanü yangi Kohima nung yimten teloktemi tenangzükba ka NBCC den agiogo.

Tanü Brehostibar nü NBCC teloki Nagaland nung tenteta aliba yimten teloktem den election merüka alitsü asoshi shisalemsatepba senden nung adenertemji Naga Peoples' Front (NPF), Bharatiya Janata Party (BJP), Nagaland Pradesh Congress Committee (NPCC), Democratic People's Party (DPP), Nagaland Congress, Janata Dal (United) aser Aam

Aadmi Party (AAP) teloktem nungi lenirtem liasü.

Nagaland nung 2018 küm tetenzüklenbo election agütsü anendaka lir, anungji iba election nungbo vote mayoktsü aser vote malitsü aser pei vote peisasa enoktsütsü asoshi NBCC teloki anir tangatetba agüja jajadagi

Tanü iba senden nung adener yimten teloktem nungi lenirtem aser NBCC lenirtem na tsüingda taruba election nungbo nisung ajaki election nung timi shilem agitetsü tenangzüktepba agiba mapang parnoki peisasa pei tai aser tamakoktema dena nangzükba liasü.

"Nagaland nung küm aika election junga magitetba tai aser tamakokji onok ajak tamakok asütsü," ta yimten aser Arogo lenirtemi metedaksü.

NBCC leniba nung Nagaland

nung election timi agütsü asoshi inyakba nükjidong ya nübortemi yimten mapa nung shilem agidang Tsüingrem tsüingdang tai memenai ochishia shilem agütsü aser ibaji ajanga Naga nunger Khristan loktiliba merüka alitsü tangatetba nung inyaker, anungji ibaji mapa kuma inyaktsü asoshi yimten telok ajaki NBCC den teka amteper tang nungibo election mapang sen agi vote malitsü aser memesüzüksü ta telemetba ka agiogo.

Kasa senden nungsa NBCC tsüingdang Tsüingrem tenüing nung yimten teloktemi tang nungi kin, kidong mesüra mepu mesüra yimtsüing shinga danga candidate balaka shimtsü majungshitsü aser election mapang party sen malemstsü aser party apia mapaa malemstsü ta nangzük.

(Maneni tapak 12 nung...)

LKM-i L. Pangersowa aser L.L Yaden award agütsüogo



Sentong nung alakteta jaoker T. Aochuba Longkumer, Award angur ana, AKM President, LKM President-i anir office bears, sentong nung shilem agirtem, LKM nung Advisor aser sanen luden züngsemtem kar noksa nung angur.

Mokokchung, June 22 (TYO): Langpangkong Kaketshir Mungdang (LKM)-i achayanga June 22, 2017 anogo Town Hall, Chuchu Town nung LKM foundation anogo amungba den külemi küm shia agüja aruba ama L. Pangersowa Trust Award for Academic Excellence aser L.L Yaden Meritorious Scholarship award agütsüba sentong agiogo.

L. Pangersowa Trust Award for Academic Excellence ya Langpangkong nung Kaketshir HSLC nung school-tem ajak nungi tematiba jenjang nguteter nem kuli kakat den sen senpet 20000/- agütsür aser iba award ya Moamanen-i agizüka liasü. Moamanen ya Changtongya

nunger Shilutemjen aser Imlisenla na jabaso lir aser pai Fernwood School Kohima nungi HSLC nung Top 10 jenjang ajangzükter. Sentong nung Moamanen arua medentetba ajanga par tsüraburi senpet agizükja liasü.

L.L Yaden Meritorious Scholarship award ya-a HSLC nung Langpangkong nung kaketshirtem sorkar school-tem nungi tematiba jenjang nung takok nguteter nem kuli kakat den sen senpet 50000/- agütsür aser ibaaward ya Lipokrenla-i agizüka liasü. Lipokrenla ya Chuchuyimlang-tsur Temsümongba aser Onennungla jala lir aser la ya Langpangkong Govt. High School,

Chuchuyimlang nungi liasü.

Sentong nung alakteta jaoker T. Aochuba Longkumer IFS Divisional Forest Officer, Mon Govt. of Nagaland-i jembidang tanü asen lima ochimashiba indang jembir, terenlok nüngdaka aliba aser tangar dang nungi tajungtiba asütsü atema toktepba tensa ka nung alir aser item ajakji koktettsü atema tanü shisaluyimer dak dang keta lir ta kaketshirtem ayongzükba ashi. Tanü asen lima tebilemstsü agi sünger aliba ajanga lenir tajung shimtetsü nükla yur Clean Election ya tenzüker aser ibaji takok nguteta aotsübaji shisaluyimertem dak tuluka keta lir ta paisa shia liasü.

(Maneni tapak 12 nung...)

**NÜ VOTE AGI NAI
AGINÜBA AMA NÜ
TAKÜM
YANGLUTSÜSA
NÜ NEM TASHI
AGÜTSÜR**



Mokokchung Sub-Divisional-tem CFR training akar



Miss Mokokchung Kr. Sünepmenla-i nisung yirur alidang anepaluba tasa ka sayuba noksa nung angur. Mokokchung, June 22, 2017.

Mokokchung, June 22 (TYO): June 19 nungi tenzuka Mokokchung district kübok sub-divisional tenet atema Community First Responder (CFR) yangi Mokokchung Town Hall nung kadar; Iba sentong ya Home Department kübok Nagaland State Disaster Management Authority-i nungita Home Guard, Civil Defence aser SDRF den külem sür District Disaster Management Authority Mokokchung-i ayongzüka akar.

Tanü Ongpangkong Block pur shilem agir parnok 28 nem iba kasa CFR training agütsüogo. Sentong nung

shisalen sayurtemji; Miss Mokokchung & DDMA Mokokchung Brand Ambassador Kr. Sünepmenla Longkumtsür densema DDMA ketdangser den HG, CD, SDRF jawan aser district level CFR training agia alir TOT-tem lir.

“Ni anogo ishika iba training nung dena arudang tangazükba aika ngudar aser shilem agirtem nungi telangzüba tajung den parnok jangrabangra aser angazüknüba ngua kanga pelar,” ta Tir Yimiyim osangbeneri Miss Mokokchung Kr. Sünepmenla den jembidang lai ashi.

“Iba ama training ya tanur-

tain ajak asoshi kanga tongtibang lir aser ibai ajaki metettsü nungdaker, anungji mapang shia iba amai ayongzüka akatsüla,” ta laisa ashi.

“Lendongtsüdong ya training agia alirtem dak dang ataloktsüba masü, anungji, training nung adenertemi nüburtem dang peii angazüka alibatemi lemsateptsüla,” ta laisa inyakdaksünüba olen ka ashi.

Iba training ya “nübur atema nungdakba ka lir”, ta yangji shilem agir kati iba osangbener den jembidang ashi. Iba training ya June 23 nü tembangtsü, ta angazüker.

Dimapur Press Club-i renewal form atema sangdonger

Dimapur, June 22 (TYO): Dimapur Press Club (DPC) nung züngsema alir atema 'renewal form' June 26, 2017 nungi tenzuka agütsütsü, anungji Identity Card atema züngsem ajungai iba renewal form ya July 17, 2017 anogo tashi nung DPC ketdangpur

nem agütsütsü metetdaksür, ta tanü DPC sangdong ka nung metetdaksü.

Iba anogo sülen aruba form bo kata magizük, ta kasa sangdong ajanga ashi.

Iba den külemi July 17, 2017 anungdang 12:00 ako nungi tenzuka Press Point

Supermarket Dimapur nung DPC lokti senden ka amentsü, anungji züngsem ajunga iba senden nung medema arua adentsü asoshi Dimapur Press Club ketdangpur temi kasa sangdong ajangasa mepishia metetdaksü.

Wokha nung COPTA indang sentong agiogo



June 22, 2017 nü SP Office conference hall, Wokha nung COPTA sentong nung Dr. Jonsuthung Kithan-ijembiba noksa nung angur. (DPRO Wokha)

Wokha, June 22 (TYO): National Tobacco Control Programme kübok moko ajanga nisung ka temang nung timtem agütsüba aser ozüng amshir atema COTPA 2003 mapa küma inyaka aotsü nükjidong nung June 22, 2017 nü sentong ka SP Office Conference hall, Wokha nung agi. Iba sentong nung Dr. Jonsuthung Kithan tongti tesemdang asü.

Moko ajanga nisung ka

temang nung timtem agütsüba onük nung jembidang, moko achiba aser amshiba tajemba kümdaktsüra moko ajanga adokdaksüba tashidak ajunga koktetsü, ta tongti tesemdang ashi aser moko machitsü asoshi ajungshi.

“Harmful effects of Tobacco” onük nung jembidang, asenok ajunga lungjemer nokdakba ajanga dang moko achiba ajemtsü, ta Dr. Meribeni Odyuo, DHO, NTCP, Wokha-i

ashi. Moko anema raraba tongbang ya talang aser tasak asütsü, saka iba tongbang ya akoktsüla, ta laisa shisem.

“Enforcement of COTPA 2003” sentong ya Wokha Police Station indang O/C, Chopathung Ngullie-i sentepa alirtem dang rasa-a ashi. Iba sentong lenir Psychologist, NTCO, Wokha, Dr. Abeni R. Kikon liasü aser tepela o Addl. SP, Wokha, Tokavi Achumi-i jembi.



OFFICE OF THE DIMAPUR AKHOYA FELLOWSHIP "SENSO SHIA TSÜNGREM DEN TIMSÜR KAKA" SARASADEM AYONGZÜKER

Dimapur Akhoya Fellowship ajanga June 24, 2017 anepdang 6:00 Ako nungi 9:00 Ako tashi sarasadem sentong renema lir, anungji iba sentong nung senso aser anükapang ajaki sarasadema shilem tajung agütsü ayongzüker.

Tesentepdak: NCRC Tenlaki,
Half Nagarjan, Dimapur.

Kohima DC-i Aadhaar enrolment atema metetdaksür

Kohima, June 22 (TYO): Kohima nung mata-mabensartem Aadhaar enrolment asütsü atema July 7, 2017 nü Kohima Deputy Commissioner office nung arua agütsü asoshi Kohima Deputy Commissioner (DC), Rajesh Soundararajan IAS-i metetdaksüogo.

Mata-mabensartem ajunga iba anogo nung arua Aadhaar enrol asütsü asoshi DC ajanga shisem. Unique Identification Authority of India (UIDAI), Government of India ajanga

sangdonga aliba ama iba biometric agiba mapang item document rongnungi copy mashi ana bener arütsü asoshi lenir ajanga nenshia ashi:

1. Passport. 2. PAN Card. 3. Ration / PDS photo Card. 4. Voter ID / Date of Birth. 5. Driving License. 6. Government photo ID cards/ Service photo Identity card issued by PSU. 7. NREGS Job Card. (8) photo ID issued by Recognized Educational institution. (9) Pensioner photo Card. (10) ST aser Indigenou.

Residency Colony-i senden ayonger

Dimapur, June 22 (TYO): Residency colony-i Clean Election Campaign atema June 24, 2017 (Honibar) anepdang 8:00 ako nungi Council Senyur kidang lokti senden

ayongzüko, anungji iba senden nung colony pur ajak medema adentsü metetdaksür, ta colony Chairman-i tanü sangdong ka ajanga metetdaksü.

Assam nung liso telok balalai ali temeten atema senden amentsü

Guwahati, June 22 (Agencies): UN Declaration on the Rights of Indigenous People kübok temeten balala nung ajemdaker Assam nung liso tentetemi akhidang nungi parnok meyong li temeten kümzüka ayutsü atema June 24-25 anogotem nung Moran nung senden ka ayongzüko.

UN Declaration on the Rights of Indigenous People atema India linükia tezüngzüktep agia lir.

Assam Sanmilita Mahasanga (ASM) working President, Motiur Rahman-i, "Liso nüburtem atema, Assam ya akhidang nungi parnok meyong li lir, aser iba ya kümzüka ayutsüla. Ajisüaka yamaji meinyaktet. Anungji liso telok balalai pei temetentem

atema raratsü. Taruba sendenji, 2007 küm September 13 nü UN-i sangdongba nung rangloker akatsü. UN sangdong nung agüja aliba temetentem atema onoki nokdaksü, kechiyong India-ia iba tezüngzüktep agia lir," ta metetdaksü.

Supreme Court-i, 1971 küm March 25 sülen ang Assam-i arurtemji 'bendangertem' ta bendangtsü akok, ta obendang agütsüba anema ASM-i temepishiba ken o ka agüja lir.

Assam atema March 25, 1971 anogoji telatetba ka süra 1951 küm nungi tenzuka state telungi aita alir bendanger nisung lakh aika sensotem kümogo, mesüra sensotem akumtsü, ta shia ASM-i ibaji anema nokdaker.

Arunachal: Yimtsüng ajak nung light agütsütsü

Itanagar, June 22 (Agencies): Tanü Rural Electrification Corporation Limited (REC) Chairman aser Managing Director, Dr P.V. Ramesh-i anir REC ketdangsertemi Arunachal Pradesh Chief Minister, Pema Khandu ajurua state nung Deen Dayal Upadhyaya Gram Jyoti Yojna (DDUGJY) küok inyakba mapatem indang jembia liasü, aser iba mapang nung REC ketdangsertemi iba maparen nung state sorkar akokba tashi yaritsü ta metetdaksü.

Linük nung yimtsüng timtiba nung light mesangoka maliba state ji Arunachal Pradesh lir.

State yim 1230 nung light mesangoka mali, ajisüaka DDUGJY kübok item yim 335 nung grid connectivity ajanga light agütsütsü aser yim 895 nung solar installations ajanga light agütsütsü.

Senden nungsa Chief Minister dang, tan ita yim 8 nungbo light mesangoktsüogo, ta metetdaksü.

Chief Minister-i, rural electrification programme ya akokba tashi tekaratiba nung inyaktü aser taküm December ita tashi nungbo state kübok yim ajak nung light alitsü atema power department-i inyakdar, ta metetdaksü.

BTC-i Veterinary Doctor tem nem Motor Bike agütsü



Kokrajhar, June 22 (Agencies): Bodo land Territorial Council (BTC) kübok district 4 nung veterinary doctor tem nem motor bike 10 lemstögo. Kokrajhar Veterinary campus nung sentong ka nung item motor cycle indang jabi aser kuli kaketem, BTC Animal Husbandry & veterinary department nung sanen luden züngsem Shyam Sundi-i agüja liasü.

Shyam Sundi ya BTC Fishery & Animal Husbandry aser veterinary department nung sanen luden süngsem ka lir. Osangbenertem den jembidang pai ashiba agi, BTC chief Hagrama Mohilary-i nüburtem nem tali temolung

agütsütsü nükjidong nung jenjang tasen ka agia, BTC kübok district 4 nung veterinary doctor tem nem motor bike 10 agütsüo.

Pai ashiba agi, iba jenjang ya BTC Animal Husbandry & veterinary department-i tamasa agir aser iba amala sentong ya state jenjang nunga tang tashi nung inyaka mali.

"Veterinary dispensarie tem nung doctor tem pei tata district aser sub-division tem nung mapang shidak nung nüngdakba mapang nung teti lidaktsütsü aser iba ajanga parnoki khuret tali tajungba angatetdaktüsü nükjidong nung BTC AH & veterinary department-i Motor Bike tem lemstö," ta paisa ashi.

Sundi-isa ashiba agi, yimdaklirtem-i parnok nashi aser chang tem nem tang tashi

vaccine magütsür aser iba ajanga aluyimba nung parnok timatemer. Maneni nüburtemi vaccine agütsütsü asoshi jangjaa mali anungji pai aluyimertem ajak dang parnok indang nashi aser chang tem nem vaccine tutsütsü asoshi mepishe.

Motor Bike lemzüker rongnung doctor kati ashiba agi, iba bike ajanga parnok mapa nung kanga teyari agütsütsü aser nüburtem ajangzüksü, kechiyong doctor aser staff tem teyari agütsütsü asoshi tekaraba nung tesem balala oa tongtettsü.

Pai ano BTC ketdangsertem dang mozü aser vaccine mapang shidak nung agütsütsü asoshi mepishe aser nüburtem nem teyari tajungba agütsütsü asoshi veterinary hospital amenoktsü asoshi mepishe.

Assam CM-i asür nem sen lakh 6.5 teyari agütsü

Guwahati, June 22 (Agencies): Assam Chief Minister Sarbananda Sonowal-i Brehostibarnü tzümetzung ajanga electricity dak kongshibanung puseta asüsang Dulal Malakar anasatiba kinunger nem sen teyari lakh 6.5 agütsütsü asoshi Kamrup (Metro) district ketdangsertem nem tetuyuba agütsüo.

CM-i tasüsanger kinunger nem State Disaster Relief Fund (SDRF) nungi sen lakh 4 aser Assam Power Distribution Company Limited (APDCL) nungi sen 2.5 agütsütsü asoshi tetuyuba agütsüo, ta sangdong ka ajanga metetdaktüsü.

Yimti nung tanep tzünglu kanga sashia aruba ajanga tzümetzung aruba Chief Minister-i district ketdangsertem aser power department den kümlemi asadangogo.

Pai maneni ketdangsertem dang tasüsanger kinungtsü nem APDCL kübok mapa tapet ka agütsütsü asoshi shiogo.

Sonowal-i district administration, Guwahati



Municipal Corporation, Assam Police, SDRF aser APDCL purtem dang külemi longjemer yimti nung lendok ajurutsü aliba tesemtem bushiteta tekaraba nung tapet jenjang agütsü asoshi tetuyuba agütsüo, ta kasa sangdong ajanga metetdaktüsü. Chief Minister-i ano parnok dang anogo 7 tsüngda nung pa nem osang agütsütsü asoshi ashi. Pai maneni iba amala tensa mapang mapa tekaraba nung osang tsüsanger agiteba inyaktetsü asoshi local jenjang nung committee tem kümettsü asoshi tetuyuba agütsüo, ta sangdong ajanga maneni metetdaktüsü.

CM Chamling-i Gorkhaland takhangba pusemer

Gangtok, June 22 (Agencies): Chief Minister Pawan Kumar Chamling-i North Bengal hills nungi Gorkhaland ka kümettsüba atema akhangba temai adoka pusemogo.

Mongolbarnü Home Minister Rajnath Singh dangi shidi ka nung Chamling-i yamai zülutsü: "Darjeeling Hills koba India nung Gorkha nung national maitsü dak sendaktepa ali, iba nung aliba nüburtemi takhangba agütsüba ajanga mapang talangka nungi ataa aliba temeden ka agütsür asütsü. Gorkhaland state ka kümetetba ajanga iba tesem nung teti asoshi yimji yimjung bener arutsü aser Sikkim-a

kechi tetsükdangtsü makai renloka otettsü."

Chamling-i Gorkhaland akhangba nung longkak aitba sentongtem ajanga küm 30 tashi NH-10 mapangshia mokdanga ayuba ajanga Sikkim asoshi tetsükdaktüsü adokba metetdaktüsü. "Lenmang nokdangba ajanga tenüngdakba osettsüset tem belenba nung tetsükdaktüsü adoker, iba ajanga nüburtemi timtem aika ajurur. Maneni lenmang kodang ang nokdangtsüar mejangjaba aser kodang ang kechi ataloktsüar mejangjai dang aliba ajanga nüburtem lendong nung toktsür," ta paisa ashi.

Sikkim nung kaketshirtem Darjeeling aser India state

balala nung azüngertem aser temang anepalutsü asoshi mozüki balalai aotsüpurtema tanga lenmang kecha maliba ajanga timtem liaka iba lenmang nung dang senzüsüsa akümer. Darjeeling hills nung küm talangka tibilemstütem adoka aruba atema teti asoshi telemtetba ka agütsü atema asüngdanga, 2011 küm Sikkim Assembly-i bill ka agizüka liasü, ta CM-i ashi.

Gorkha Janamukti Morcha puri West Bengal hills nung Gorkhaland state tasen ka kümettsüba atema khanga mapang telatet ka makai longkak aitba mapang ka nung, Chamling-i iba tebilemba lemsatepa liasü.



Agartala, June 22 : Brehostibarnü Agartala Airport nung Assam Minister Hemanta Biswa Sharma BJP lenirtemi agizükba noksa nung angur.

Tripura nung gari tsütep; ka asü

Agartala, June 22 (Agencies): Dhaka süia Kolkata-i aoba Tripura passenger bus ka Bangladesh nung gari ka den tsükteba lendong nung nisung ka tsükset aser ana yiru, ta transport ketdangsertemi metetdaktüsü.

"Maitri passenger bus Bangladesh sorkar gari ka den Petrapole-Benapole arrtsü anasa tsüktep," ta ketdangsertemi metetdaktüsü.

Tasüsanger ya sorkar gari anisangji liasü aser yirurtem rongnung Bangladesh nung ketdangser ka densema liasü.

Transport ketdangsertemi ashiba agi, Tripura Road Transport Corporation meyong bus anisang ya Bangladeshi police-i puogo.

"Bus nung mena aliba nisungtem kata meyiru. Onoki iba ken o dak sendakba nung Daka nung Indian High Commission den osang agitepdar," ta parnokisa metetdaktüsü.

India aser Bangladesh sorkar na longjemer Kolkata-Dhaka, Kolkata-Dhaka-Agartala, Agartala-Dhaka, Agartala-Dhaka-Kolkata aser Kolkata-Khulna international bus services agütsüdar.

Kolkata-Dhaka bus service ya kiyonger ana tsüngda mezüngbuba bus service lir aser iba ya 1999 küm July ita amenoka liasü aser iba sülen Agartala-Dhaka bus service 2003 küm September ita amenoka liasü.



Diphu, June 22 : Brehostibarnü, Diphu nung Karbi Autonomous Council election mapang polling station ka kima police temi nüburtem ajok agi züka meinshiba noksa nung angur.



TIR YIMYIM YIMOBILEM (EDITORIAL)

DIMAPUR FRIDAY, JUNE 23, 2017

Mopong tajung nungdaker

Nisung taküm alitsü atema dang masü saka anema alitsü asoshi mopong tajung aser temerük nungdaker. Taküm liaka anema melira kechi asütsü, iba jenjangji bilemdanga nisung shiai alima nung mopong junga kümdaktsütsü asoshi mapa tilakabosa inyaktsü nungdaker. Atangji, mopong merüka junga alitsü atema asenoki mapa tuluka meinyaktettsüa akok saka asenok ajaki pei akok mapa tila kabosa inyaktettsü. Iba mapa tilakaji süngdong ka tema yutsüba asütsüa akok, akok tashi mokozü madokdaktsütsü merangba asütsüa akok, süngdonglidong wazüka ayuba asütsüa akok, paper meyaka amshiba asütsüa akok mesüra akok tashi gari mebeni tetsüng agi jajaba asütsüa akok. Item ajakji asenok asoshi takoktsü, anungji asenoki ibaji asen taküm nung yimya kümdakja inyaktsüla. Tanü asüng balaka alima tsüka akümba asenoki metetter. Aji oda, alima ya akhidang nungi tatsük asadangba celsius 0.5 nungi 1 tashi ka danga tsüka aküm nunga süng alima tesem aika nung ayong kongadoktsü aser rüjep aliba tenemtem yimsaa aoba ajanga tzüim tzü ulua akümba dak alaka tzü tajung samadoktsü aser mopong tatsük kümadoktsü. Iba ama tarutsü taji ngu asenoki tang alima nung tzü aser mopong merüka ayutsüsa meinyakra, 2100 AD küm tashi nungbo alima nung tzü tajung kenyongi mangutsüsa menenadoktsü ana nung lir. Asenoki angatettsüba kaji asen aliba lima ya tarutsü lanurtem lima lir, anungji parnok marudang asenok ken lia alir amai bilema asenok alitsüla. Tetezü tanü asenok aliba ya alima tatembang kümtsür amai meinyaktsüla. Iba tangatetba nung asenok lira asenok dang masü saka asen semchirseemnurtema janratema liyonga aotsü. Atangji, tzü mopong memenendaktsü merüka ayutsü atema arem wazüka ayuba mapatem dang masü saka tanü lima nung industry tapu balala lapoka mapa inyakba aser anogo shia gari zünger mezüngma alima sünga senzüba mapatem nunga asenoki kanga bilemdanga inyaktsü nungdaker. Akok tashi industry tapu balala lapoka inyaktertemi temeket nung süngdong peria atemtsüla aser industry nungi aliba mozü tzü aser janaona tesem mashi nung mashimashi meindoktsüla. Ano, gari akartemi alima meima inyaktsüba mapa kaji akok tashi tetsüng agi jajatettsüba aser atongtsüba tesem tashika tashibo gari mebeni tetsüng agi jajatsüla. Iba tangatetba lemsateptsü asoshi taoba mapang ka asenoki iba yimobilem nung " Nagaland nung tzü mopong merükteta yunüba temaitsü ka sayua Deobar nü amangba purtem ajak tenla kidangi aodang gari mebeni tetsüng agi ao nunga koma süla ? " ta asüba tasüngdangba ka nung shisalemsatepogo. Atangji, yimtak yimtsüngtem nungbo tenla kidangi aodang nisung ajak tetsüng agidang aoer, kechiyong len talanga masü aser tenla kima gari anendaka sadema mali. Ajisüaka, town-tem nungbo nisung ajak amato gari nung dang tenla kidangi aoba mapang ka lir. Atangji, town-tem nung sentepi aotsü len talang, anungji gari nung aotsüsa akümer. Ano, Dimapur ama nungbo anü tatsük agi tatsüka tetsüng agi jajatsüabajia aikati metizükteter. Ajisüaka, ano anameta nung alirtema gari nung tenla kidangi aotsüba 'fashion' amato ka kümer, gari nung mesüra tetsüng agi mounür. Item ajakji alima yimya anungji tangatetba ka dangi liromedema arudaktsür külen nisung shiai alima kümzüksü atema langka kabosa inyaktsüla ta asüba tangatetba nung, Deobar ajak mesüaka ita nung Deobar ana danga sentepi tetsüng agi aoba anogo litetra, ibaji alima asoshi tenla tulu asütsü. Iba ama inyakyim ya joko tashitemetter lima aika nung tenteta odagi. Iba ama tangatetba ya asenoki mapa küma tenzüktet ka asübo ajak atema angazüka bentshia aotsü mapa tajung ka süla. Iba denji ano asenok ajaki electric light atsükba ya akok tashi ajema atsüksü merangra, iba jagia alima mekongka kümdaktsütsü. Alima ya asenok alitsü asoshi Tsüngremi yanglutsüba lima, anungji Kibur-a pelatsüsa asenoki Pai yangluba lima ya merükmerüka topur jungjunga anepalutsü tim.

OLEMSABANG

Myanmar nung Naga nunger tia Democracy sülen

Myanmar nung putu aika sepai yimsüsüba kubok nebur rishikangshi tulu liaka Naga nunger Myanmar nung alirtem atemabo Naga Baptist Convention (NBC) aser Naga Yuya benjong agitsü tenokdangba makai jenjang tila ka lapoktsüba ajanga Naga nunger Myanmar nung alirtemi asen Naga suiren, raren, sobaliba, libaliro aser Christian tamangba mesamai tanen maka bentshia aru.

- IMRONGSUNGBA, ARKONG WARD - MOKOKCHUNG.

Myanmar nung Naga kin - Anal, Konyak, Lamkang, Leinong, Makury, Moyon, Khamniungan, Para, Somra, Tangshang - putu aika sepai yimsüsüba kubok kanga rishikangshia lia aru. Pei lima aser kibong dang nungibo pei takum kumzüksü, sepai tamokpangba nungi, tulutiba sür tetsübu tensa tia nung lia aru.

Kodang 7th November 2010 kum Myanmar nung election agi, iba election sülen (Democracy) Naga kin Myanmar nung alirtem atema lenmang aisü nung tajangzük tulu ngua arudar. Küm shia 15th January nü Naga nunger Myanmar nung alirtem atema benjong tulutiba "NagaYuya", Naga Public Organisation (NPO) achaayang kubok, mungtepdang Myanmar sorkar nungi teshimtet lenir (Elected Member) tem jaoka Naga nunger alidak jila balala nung melentepba benjongtepba arudar. Iba benjong nung Naga kin (Myanmar) balala nungi pei yartsüngsang, sobaliba ken aser tetsü-tebuo inyakyim tapu aika sayutepba ajanga longsoteper. Ano tanü putu nungbo Naga kin (Myanmar) balala nungi pei dak aketba sempet balala ajanga inyaktetba osettsüset yokteper, aser ano temelenshi tulutiba kaji joko Naga lanur (Myanmar) tazüngertemi sentong topur ajungtsü mechi tanga temesüng lima nung jiluba jilu teimba ka jiludagi.

Myanmar nung tenüng agibo pei melungba tamangba yimsü amangtsü (Freedom of religion) ta liaka sepai tamokpangba ajanga Christian tamanger tem kanga tsübuseta timtemtepa amanga aruogo. Tanübo joko asangsang nung Naga Baptist Convention (NBC) achaayang kubok Naga kin (Myanmar) shia Arogo Mungdang tentetter mapang ajak nung anisüngzük tulu nung janratema sentong balala agia Tsüngremer wadang mangdang talang yur yim arogo temi inyaka arudar.

Myanmar nung tesusatsü mapang talang ka tesangwa, tzü, lenmang aser tongtepratep kecha makai putu aika sepoy yimsüsüba kubok lia arudang par linük tulutiba ka rajang (Retardation) kümdaktsü. Democracy sülenbo joko Naga nunger yim (Myanmar) teimba ka nung lenmang yanglua arudar, tzü yim teimba ka nung mesüa arudar aser anü-ajanga-agutsüba tesangwa (Solar Light) oset yimtsüng nung kibong shia dangi lemshia arudagi. Ano tanemi tongteprateptsü (Telecommunications) lenmang balala nungi bushitepba amenloktsü merangtepdagi.

Sepai yimsüsüba kubok alidang kaket shisaluyimba nung asen Naga nunger (Myanmar) kanga teküpboktiba jenjang nung yutsü; shisaluyim dak (School) Burmese oshi dak alaka kecha oshi agi sayutsü memela, tesayur nem ita sen onsara ishira (tenüng agi) agütsü, aser political-social-economic-religious renloktsü (Development) onük kecha Myanmar litsü kubok sayutsü memelai aru. Saka tanübo shisaluyim dak Burmese aser English oshi agi sayutsü mela aser tesayur nem ita sen alemli nungi teimba agütsür. Shisaluyim dak tasen yim aika nung lapoka odar aser tesayur akümtsübuba jenjang jia onsara ajungketogo. Ano Naga Public Organisation-i shisaluyimtsü asoshi Naga nunger (Myanmar) alidakbo Nagamese tesayur shimtsü tezuluba nung Myanmar sorkar nem agütsü aser iba tezuluba jia memenui ataloktsütsü amanger.

Naga nunger (Myanmar) asoshi rishikangshi, sepai yimsüsüba kubok alidang, tulutiba kaji asen Naga nunger (Myanmar) teburtem teimba ka Myanmar sepai indang khu bener anogo, ita aser küm jungnüa pei ki toktsür Myanmar tekongtenem miinlushi tulu ajunga ajangdanga timtemseta senzü aser külen pei kinungtsü aser chirnurtem yimtsüng nung tama kangshitsü agi Myanmar sepai-i kangshi. Myanmar sepai-i Naga nunger (Myanmar) dang o ka ashibaji, "Nenok Naga nungeri onok meyong kor (Horse) ajak 1975 -76 nung tepset, anungji kor melen nenok Naga nungeri onok meyong khu abentsü" ta shia aru. Saka tanübo item rishikangshi ajak tu tanemi anenogo.

Tako agi tanang asen Naga nunger (Myanmar) tia Myanmar nung kümdagi. Joko democracy sülenbo "Naga Hills Administrative Zone" ta Myanmar sorkar-i yimiyim agütsü, aser iba inyakyim takok ngua aotsü mechi Myanmar sorkar-i achaayanger tejangja lenisüba kubok Naga nunger (Myanmar) timtem aser taginüba repringtsü tenzükgogo. Oda, putu aika sepai tamokpangba kubok lia aruba ajanga Naga nunger Myanmar nung alirtem shisatsü rajang kümdaktsü saka iba democracy sülenbo Naga nunger Myanmar nung alirtem tanemi tejakleni aotsü asenok ajak tamang aser teimla.

Iba Olemsabang nung lemsaba ken-o aser shisatsü ya iba ocet zülur-i bilemba ken-o ama tazünger-i angateta agitsü mepishir

TEMESHI LAISHIBA

~ R. Lipok Jamir

Tsüngremi nükjidong tajung nung anüng, alima aser yangji Pai nüksüng subotsütem, shirurudem, nisung aser Eden yanglua tenzü, ajak tabensa Pai renemetet; Tsüngremi Adam dang koba tajung, aji azüeta tashi angaa bentshitsu atema ozüng agütsü, aji odasa nisungsangi anir litetlasang; meimchirtem menen yong alima shitoktsü, rongtoktsü, tzu metsüng agi samatsüsü ta, mesüra alangzüksüsa mataloki lila, oda kotak aser molumi petdangtsüsa aküm nungji, nisung shia asoshi taküm piyong tatempang matong tashi tanü dangtsü, azüoktsü, tatidang nungi jenbutsu, lenitsu, renema alitsu, tekümet angutsü aser kotaki anitsu asoshi Temeshi Lai ya Tsüngrem nungi meimchir dangi yok. Laishiba ya makalasang asen tamang shir dak, kong lila ? Shirnoki iba Temeshi Laishiba asen oshi nung ratetrateta meyipzüka asenok Tsüngrem tali meteta Pa den longjemdaksür parnok dang pelaa Tsüngrem tenüng sangdi, tang aseni amshiba Temeshi Laishiba ojangtem, kaket quality, volume aser renemetetba apibo sen meyirjang tema langa liaka jenjang masadangi asenok ket angati ama atajemdaksür, anungji asenoki temulungjang telungi ia shisadanga asen temeim tamang agi Bible Society of India nung inyakertem asoshi sarasademtsüba den mulungsoa tenladi ta ayongzüker. Tatem nung Tsüngremi kü nem agütsüba LAISHIBA ken ya tazüngertem den lemsatepner.

LAISHIBA

R. Lipok Jamir SWM

1. Lai-shi-ba na Tsüng-rem te -me-shi o; ko-bai ni-sung dang ko -tak len
 2. Shi-bai te -me -shi Lai o a -met -er; ke -cha nung-a ko -dang -a ma-
 3. O te -me-shi Lai, ne dak jen-ok -er me-nen ta -ti -dang nung-i jen-
 4. Te -me -shi Lai ta -ne -la tzu-pokdak; me -me -len -shi -ba Tsüngrem -er

sa -yur. oh Lai-shi-ba na te-sang-wa mi -len; ko-bai a -sen te-tsüng lenmang
 -lang -er; oh te -me-shi Lai na a -zü -et -ra; ne ta -shi a -gi mo -jing a-
 -tet -er; oh te -me-shi Lai; na te-süngmang-tsü, ne o -jang-tem a -jak -ji o-
 o -seb; te -ja -shir pe -la -tsü mo -zü ta -jung; mangyim, mu-lung zü-rep -er te-

Leplazü:

a -nir.
 -jen -er. Na on -sa -ra te -me -shi, sen -ti o; amman nung a -lir sang-wa a -gü-
 -chi lir.
 -sü -nep.

-tsür; ne o ta -rok nung shi -ri a -mang -er. Te -ti te -pe -la -dak li -mai a -nir.

ANOGO ABEN TSÜNGREM DEN

TALANG ALIBA NISUNG : YOHAN 18:15-27

Ibai nütsüng ka liasü shiba dang "Lung" ta aja. Asen Kibubai tarutsü tia nung ranglok aser Simon jakla nung taochi aser tazüokba lung ama temerang angu. Saka ano yangi mekangsatsüsa lung temerang peria maliba angur! Peter tashimait liasü; pa melokshishiba lung ama masü; mopungi onshiba tzütok ama pa liasü. Kilitsür kati pa den miima jembi, aser pa mulungjang nung tasü mait aita pa bangi tiyazü jembi aser pai Kibuba magizük.

Peteri sen meimba magizük masü, saka pai nisungtem tsübu. Pai korang mebushi saka telok ain adokba nungi kümzüksü merang. Pai narozük nung mesot, saka noklang nokji paitoktsü merang. Ibai merumeruba masü, saka tasü mait, koba agi pa lemang shimtetdaksü. Pai Kangki nung angenlokbaji paitok! Pai Kangki ka angu, aser tiyazü tulu jembia aji paitoker tangaleni ao.

Saka Kibubai Peter den tatem maküm. Pai maneni Peter yanglushitsü. Kenü Pai pa tenüng tasen jangjatsüsü. Kenü anogo asenoki ibaji zülur angutsü; "Kodang parnoki Peter tasü aitba angu, parnok süngmanga liasü!" Khen kilitsür kati pa atentendaksü. Tang pai "tasü ita aser melokshishi" temaba jenjang nung noktaksü akok.

Tasü mait tanela, khen atema bilema, aser nisung tsübuba nungi ni kümzü kang, Kibuba.

UK-i 'Climate Change' atema inyaktsü nangzü kba pelaa agizüker: Christian Aid



London, June 21, 2017: Bodhbarnü central London, Britain nung Parliament senden tenzü kba anogo nung Britain Chubatsür, Elizabeth-i jembiba noksa nung angur.

June 22, 2017: Bodhbarnü Parliament nung Queen Elizabeth-i jembiba sülen Christain Aid-i, UK sorkari alima atema Paris Agreement tanaben asüngsashiba atema tenüngsang agütsüogo.

International humanitarian organization-i, iba sangdong ya ajanga yimtenren lenirtemi iba onük nung mera tulu agitsü lemtetba sayur, ta ashi.

Christian Aid's Head of Advocacy, Tom Viita-i, "Iba Parliament nung Queen-i jembiba onük ajanga climate change nung mera tulu agitsü sangdonger, Paris Agreement ya atangji nung ataloktsü atema joko party ajaki meranga inyaktsüla," ta ashi.

Christian Aid-isa, UK-i climate change atema süoki ia inyaker asü masüar alima lenirtemi tenziük yoka repranga atatsü. Alima sabang nung linük (UK) jenjang tanaben asentenshitsu asoshi mapa küma inyaktsüla," ta ashi.

Viita-isa, "Paris Agreement ajanga European Union adener International jenjang nung amalitepa inyaktsü asoshi sabang agütsür, aser alima jenjang nunga UK nem tongtibang jenjang ka agütsür," ta ashi.

"Brexit nung ken otem ajanga alima jenjang nung amalitepa inyakba maparen nung sorkar nem tetsükdaksü bener marutsüsüla," ta paisa ashi.

Tan ita tetenzüklen US Tir, Donald Trump-i Paris Agreement nungi ainshiba ajanga Environmental teloktem aser Church of England-i pa aija liasü.

Paris Agrreement ajanga alima linüktemi temperature 2 degrees Celsius ajema kümdaktsüsü atema inyaker.

Tawa kiralongrartemi Manchester aser London amakba sülen tang linük nung aliba ozüngtem nung temelenshi alitsu, saka bill tasenbo mesangdong.

Iba dak sendakba nung Queen Elizabeth-i, "Ozü sorkari kiralongra anema asalentong reprangshia nüburtem kümzüka ayutsü asoshi kiralongra dak sendakba anema police aser security services nem parnoki nüngdakba tashi ajak agütsüsü," ta metetdakja liasü.

Tawa kiralongrartemi UK amakba sülen tamalen Theresa May Home Secretary inyakdang lai police force nungi ketdangser 20,000 ajemtsüba atema la aija liasü.

Office of the
CHRISTIAN HOME MINISTRY (INDIA)
 HEAD OFFICE-PADUMPUKHURI: DIMAPUR-797116.
 THEME: - "MADE ALIVE IN CHRIST"-Effesia: 2-5.

NAGALAND ATEMA SARASATEMSTÜ CHRISTIAN HOME MINISTRY-I AYONGZÜKER

1. Naga lima Khrista asoshi asen tsüraburi Tsüngrem den azüngashiba ajanga tanü Naga kin aser lushi Tsüngremi tzu mopung tajung aser tashidak tamajung nungi kümzüka yutsüba asoshi sarasademdi.
2. Naga kin Tsüngrem tenzükertem ajak tsükchir nungi kümzüka ayutsü asoshi Tsüngrem dang sarasademdi. (Il peter: 5-18).
3. Asen Naga nung Arogotem, talisa Ao Arogotem Tsüngremi tenzüker Naga kin dang ochi lenmang sayutsü sarasademtsü. (Mark: 13-3).
4. Lokti aser kija ajaki anepdang 07:00 ako nungi sarasademtsü mepishir. "Shilem agir ajak dang pelaba sangdonger."

Sd/-
Imli Longkumer
 Mission Director, Christian Home Ministry, India
 Contact no:-7642920027



Sümi Aphuyemi Baptist Akukuhou Küqhakulu (SABAK), Council of Rengma Baptist Churches (CRBC) aser Oriental Theological Seminary (OTS)-i senteper June 20 nungi July 20, 2017 nü tashi NBCC Clean Election ayongzü kogo. Iba mapang nung OTS kaketshirtem aser SABAK o CRBC nungi züngsemtemi Pughoboto aser Tseminyu nung aliba nüburtem dang Election merüka agitsü indang tesayubatem agütsüsü.

OLONG PAITEP # 4460

1				2			3	4		
						5				
6										
										7
		8				9				
				10						
	11									
12					13					

TIPIEN

- 1. Tereprangtsü - 6
- 3. Kilitsü asoshi alizükba - 4
- 6. Anü aiba mapang - 10
- 8. Shitak masü - 3
- 9. Te _ _ _ daktep - 3
- 11. Injang khadokba - 10
- 12. Mezüng - 4
- 13. Kecha nunga tagidak mali - 4

LANGTSÜNGLEN

- 1. Akhüm aser mopung agütsür - 8
- 2. Tai melena sen achiba - 6
- 4. Tenem tekong kecha mali - 6
- 5. Nü dang tambu - 3
- 7. Kecha mali/maka - 6
- 8. Aria bilemtsüba - 6
- 9. Ana aküm - 6
- 10. Molunga langzü - 3

OLONG PAITEP # 4459 TELANGZÜBA

TIPIEN :

- 1. Asaya, 6. Shirang, 7. Noa, 9. Yim,
- 11. Telemsa, 12. Ita, 15. Aja,
- 16. Asentzü, 17. Tapok.

LANGTSÜNGLEN :

- 2. Apir, 3. Angi, 4. Süngya, 5. Aka,
- 6. Senti, 8. Jen, 10. Maksü, 11. Talang,
- 13. Tasa, 14. Atep, 15. Amo



ALOKBAI NAGA LIMA ASOSHI LUMIA SARASADEMER

Oh...tulusang Tsüngrem... Ni ozü Naga lima asoshi lumir ako, imlibilema nai Nü tenarong denjang nii... Nai angashiang nii...

Kibuba... reprangangjo ozü Naga lima lenmang ya....

Highway asü awatsüng'ar mebendangteter ako..... Iba ya yanglushitsü asoshi ozü Naga nunger yimsüsür nem nai apitetdakjang nii...

Oh..... takoksang Tsüngrem..... Assam lima majangi senzütsü

Foot hill road yanglur-a ta angashia pelaseta ali ako....

Saka ano sen mali anenogo ta angashia temulong züreper adii....

Tuli paper mill asentenshia lapoker-a ta angashia pelaseta alinung ano, sanction teraka aruba ajia koyalai sür oadoker

Joko kecha tejembi-a mejembi-i kümadakokogo nii...

Oh.. Teyanglur Tsüngrem.... Dimapur nungi Kohima four lane lenmang yanglutsü mapa tenzüka ngur nübor ajak kangasa pelaseta alinung.... ano ajia kechi kechi tax otsü agi meinyaki anener-a ta angashir....

Oh... Tsüngrem... Nai ozü lenir..... ozü

yimsüsür nem ozü lima meimtsü shisatsü moajang.... Amen.

-L. Kika Pongener, Aoyimkum, Dimapur.

TANÜBO NAI LANGZÜANG

Q. 'World Refugee Day' anogomung ya koba anogo nung amunger ?

- [A] June 20 [B] June 21
- [C] June 19 [D] June 22

===== (Taruba adok nung onoki langzüksü)

YASHI ADOK TELANGZÜBA : China

Tepela Tasoba Anogo

Tanur asoba anogo nung salem osang den noksa angat adokdaksünürs - Tenüng, Küm, School, Talidak & salem osang tejanga züfur, noksa (photograph - any size) ka den anogo 3 mesüra 4 jela e-mail : tnyimym@gmail.com nung yokang mesüra Tir Yimym bureau tem nung agüang.

1. Tenüng : _____
 2. Tasoba anogo: _____
 3. Küm : _____ 4. Class : _____
 5. School : _____
 6. Talidak : _____
 7. Salem osang : _____

NAIA YA METETER MA SENSOR TECHNOLOGY AJANGA TRAIN JAJAR



China lima nung tang mezüngbuba atema train lenmang nung yintep nung masü sensor technology ajanga jajatsü tawa tenzükogo. Parnoki ola mali aser mopung merüka kümzüka ayutsü mechi nung iba train ji battery ajanga jajatsü yanglu. Iba train yagi battery khi charge asüba agi kilometre 25 tashi, minute 25 nung 70 kmph tekara nung senzüteter. Aji oda süaka iba train ji metong nung metre 32 aser nisung 307 tashi dang amentsü akok aser taruba küm 2018 nungiang neburtem senzütsüsabo lapoktsütsü. Iba train ya talangba agia küm 25 tashi dang amshitetsü.

SUDOKU # 3562

3			7	6			9	1	2	9	6	8	5	3	4	7	
8	7	1					2	3	6	8	3	2	7	4	1	9	5
	6		8		3		1	7	4	5	7	3	1	9	8	6	2
	8					3			3	6	1	4	5	7	2	8	9
4		7	1	3					2	9	8	1	3	6	7	5	4
1			5	9			4		5	7	4	8	9	2	6	1	3
	1		6	4		5	3		7	4	2	9	6	1	5	3	8
9		4							8	1	5	7	4	3	9	2	6
2		6							9	3	6	5	2	8	4	7	1

TELANGZÜBA # 3563

3			7	6			9	1	2	9	6	8	5	3	4	7	
8	7	1					2	3	6	8	3	2	7	4	1	9	5
	6		8		3		1	7	4	5	7	3	1	9	8	6	2
	8					3			3	6	1	4	5	7	2	8	9
4		7	1	3					2	9	8	1	3	6	7	5	4
1			5	9			4		5	7	4	8	9	2	6	1	3
	1		6	4		5	3		7	4	2	9	6	1	5	3	8
9		4							8	1	5	7	4	3	9	2	6
2		6							9	3	6	5	2	8	4	7	1

OJANG LUTEP # 4066

- ALANAGND :
- UNGNBO :
- MANLENG :
- ANGLYUTSÜ :
- MYZIA :
- METMEET :
- ECHKIBA :
- ÜMK :
- HISA :
- KSADORAKER :

OJANG LUTEP TELANGZÜBA # 4065

GARI SENZÜTETSÜSALENMANG KAR DANGA NAGALAND NUNG LIRA KODA JUNGLA

Anü ita petinu ajanga alima nung tsüngsang mopung melenshidaksüba ama nisunger tia-a melenshidaksür ta anü ita petinu tetzürtemi ashir, parnoki ashibaji shidak asü tai'ar nai-a na asoba ita anogo den tanü nü tia medemdangang (Horoscope):



Aries
21/3-19/4

Nü dak tejangraba aliba ajanga nü mapa nung takok angutsüsa kümdanga inyakang. Nai bilemba ama tanü mapa kanga kara meinyaktettsü südi.



Taurus
20/4-20/5

Nai tanü nü mapa nung temolung agütsünüra o tali mejembitsü merangang. Saka nai lokti asosh bilemra nü mapa nung takok mangutsü südi.



Gemini
21/5-20/6

Tanü nai mapa nung temolung agüja inyaktsü bilemstsü. Saka nü medemertem den mapang beria indokang ajanga na tajangzük tuluba angutsü.



Cancer
21/6-22/7

Na tanü mapa inyakba mapang bendanga agütsütsü aser kidang o tali jembitsü südi. Nür kinungertem aginüba aser nungdakba nai ajitettsü merangang.



Leo
23/7-22/8

Tanü jembishinü tajung kar nung na shilem agitsü merangang. Saka nü medemer asere na anasa aliba nisungtem nema kasa shilem agidakjang.



Virgo
23/8-22/9

Nai tanü mapa inyakba mapang tangari meinbrongba maginütsü südi. Saka tangari na nungdakba mapang parnok senzüka medoktsütsüla.



Libra
23/9-22/10

Tanü na meketa alibga nü medemertem o jembinüba na angutsü. Anungji nai parnok nem sapang lapokjang aser na tangazükba tajung jar ngutettsü merangang.



Scorpio
23/10-21/11

Tanü anogo nisung aika o tali jembiba ajanga na temolung yirutsütsü akok. Anungji nai item o ajunga amadoktsüla aser tangar der rarabangsen madoktsü merangang.



Sagittarius
22/11-21/12

Tangar indang o jembitsüba aika na tanü angutsü. Anungji tangar jembishinü ajunga nung nai shilem agitsü temerang.



Capricorn
22/12-19/1

Tanü na lokti nung shilem agitsü tejangraba arutsü südi. Saka na asoshi maparen kar nung nü mapang indokba tajungtiba asütsü.



Aquarius
20/1-18/2

Junga sensaksem kateter nisung kar tanü nai bushiang. Tangar der mangatettep adokba kar nai akokba ajanga na balaka tajangzük mangutsü.



Pisces
19/2-20/3

Nai tanü nü mapa nung takok ngunüra tangar inyaksangshi nung temolung magütsütsüla. Mesüra tangari nü anogo raksatsütsü ana nung lir.

Sonam Kapoor noksa German Bollywood magazine nung amshi




June 22, 2017: Bollywood actress aser tan ita arishi küm 32 ajungla, Sonam Kapoor-i la pelatsüsa taküm la tebilemba aika ataloka arudar, aser maneni la noksa German Bollywood magazine 'ISHQ' cover nunga amshiogo.

2005 küm Sonam-i mezüng Sanjay Leela Bhansali-i direct asüba 'Black' film nung assistant director ka ama inyaka liasü, iba sülen Bhansali-i pa indang nüknürar film 'Saawariya' nung Sonam nem actress shilem agidakja liasü.

Sonam-i ramp nung shilem agiba aser film festivals nung shilem agiba dang masü saka magazine cover aika nunga la noksa amshiogo.

'ISHQ' magazine ya German oshi nung mezüngbuba Bollywood Lifestyle magazine ka lir aser 2017 küm June ita magazine nung la noksa amshiogo.

Foo Fighters-i Sept nung 'Concrete And Gold' kensep sayatsü



Dave Grohl & Taylor Swift

jembir masü. Iba kensep nung aliba ken ka nung yarisema tena lir, aser nisungbaji shibaar onoki shinga danga mashitsü," ta paisa ashi.

Ajisüaka iba nisungbaji nungtugu kentener, Taylor Swift asütsü südi, ta bilemer kechiyong tamalen Beatles züngsem, Sir Paul McCartney-i ayongba kenten sentong ka nung Swift-i Grohl yaria lir, iba den külemi tang alima nung pop star tajungtiba la (Swift) lir.

Foo Fighters indang tesütüba kensepji 2015 küm sayaba Saint Cecilia EP aser 2014 küm Sonic Highways lir.

'Concrete And Gold' kensep nung aliba kentemji: 'T-Shirt', 'Run', 'Make It Right', 'The Sky Is a Neighborhood', 'La Dee Da', 'Dirty Water', 'Arrows', 'Happy Ever After', '(Zero Hour)', 'Sunday Rain', 'The Line' aser 'Concrete and Gold' lir.

June 22, 2017: Kentener telok, Foo Fighters-i parnok indang kensep tasenba 'Concrete And Gold' taküm September ita nung sayatsü, aser iba kensep nung alima nung pop star tajungtibaia shilem agia lir, ta metetdaksü.

Ken tasen 11 aliba kensep ya Greg Kurstin-i produce asür aser iba kensep ya taküm September 15 nü sayatsü. Iba kensep nung 'Run' (below), 'The Sky Is A Neighborhood' aser 'La Dee Da' ken densema lir.

BBC Radio 1-i interview agidang Foo Fighters tongti lenir, Dave Grohl-i, iba kensep nung tanga kentener kar densema atenba kentem lir, ta metetdaksü.

"Alima nung pop star tajungtiba densema lir. Ni asayaa



Ahmedabad yimti nung Bollywood actor, Shah Rukh Khan-i pai shilem agiba film, 'Jab Harry Met Sejal' nungi Radha ken sayaogo. Iba sentong nung pai tetsür ajak dang pa temeim lemsatepa 'hu tane prem karu chu' ta ashiba ajanga tetsüe ajak peladaksü. Iba sentong nung kasa film nungi Anushka Sharma bo medentet, ajisüaka Shah Rukh den film director, Imtiaz Ali bo liasü.

TAN HOPTA ATEMA - KOMA SÜLA ?

Q. Nagaland government nung ochimashi inyakba mapatem ajunga ya CBI nem bushisüngdaksütsü asoshi temelaba agütsü nunga koma süla ?

Tanurtemi anogo nung Smartphone, Computer amshiba nung ghonda 5 indoker



June 22, 2017 (Agencies): Lanurtem tech balala amshirtemi anogo nung smartphone mesera computer amshiba nung mapang ghonda 5 tashi indoker, ta security software firm Bitdefender-i bushisüngdangba nung ngutetogo. Tanur ka ainba den külemi online nung mapang indokba anasü agi tali akümer.

Bushisüngdang ajanga ashiba agi, tanur tenet nung ka ket nungbo smartphone aser computer na prongla lir. Item oset balala amshiba yimya ya küm ainba den tali tamshiba akümer. Arishi küm 5 asüdang

tanur kati anogo nung item device tem ya ghonda asem shi amshir aser aser pa/la küm 17 ajung tashi nungbo item device amshiba mapang ya anogo nung ghonda pongu shi akümer. Temetetsü kaji küm 10 nungibo teburtemi tetsürtem dang nungi shilem 30 agi tali amshir (ghonda ka shi agi talila koba game asayaba amala nung indoker) aser küm 12 nungibo tebur chanu aser tetsürchanu ajaki computer dang nungi smarphone tamshinüba akümer.

Tanur arishi küm 5 nungi 17 tsüngda nung alirtemi anogo nung computer amshiba nung

mapang ghonda ana indoker aser kasa mapang nung smarth phone amshiba yimya küm ainba den külemi anogo nung ghonda ka amshia aliba tain aküm tashi nungbo anogo nung ghonda ana dak tali amshia akümer.

Iba bushisüngdang ya Bitdefender-i 2017 April ita agia liasü aser parnoki 'Bitdefender Parental Advisor' amshirtem dang nungi osang agia iba bushisüngdang agi. Bitdefender Parental Advisor nung Bitdefender Internet Security, Bitdefender Total Security aser Bitdefender Family Pack densema lir.

'Amazon Prime Wardrobe' sayatsü

June 22, 2017 (Agencies): Shishilembaba nung jenjang temaba kati ajungkettsü nükjidong nung Amazon-i parnok indang site nungi süoshi alirtem nem mali tsüngda semdangdaksütsü asoshi maongka agütsütsüba sentong tasen ka amenoktsü.

Iba sentong dang ya "Amazon Prime Wardrobe" ta ajatsü. Iba sentong ya tang asadangba mapang ka lir,

ajisüaka tejangrartemi iba sentong amenokba jangjanera 'sign up' sütettsü.

Iba sentong kübok tetsür, tebur aser tanurtem atema style balala nung Calvin Klein, Levi's, Adidas, Timex, Theory, Hugo Boss, Lacoste, J Brand, Milly, Parker aser ano tanga brand aika indang süoshitem angutsü aser Prime member temi süoshi order asübatem kidang semdang tanginübatem dang

shima agitettsü.

Osang ajanga ashiba Prime membership saru dak alaker osettem kidangi bener arutsüba aser maginünbatem meyiba bener yokba nung talila sen kecha magitsü.

Iba den bendenloksema talirtemi süoshi asem mesera pezü alira 10% discount agütsütsü aser süoshi pongu dak tali alira 20% discount agütsütsü.

OnePlus 5 jenjang 32,999 nungi tenzüka India nung sayaogo

June 22, 2017 (Agencies): OnePlus 5 India nung tanü sayaogo. Iba smarphone ya tapu ana nung angutsü, ka 6GB RAM den 64GB storage keter aser tanabubaji 8GB RAM den 128GB storage keter angutsü aser sen jenjang ji ka 32,999 aser tanabuba 37,999 ta alitsü. OnePlus 5 phone ya June 22 nü nikongtsütsü 4:30 nungi tenzüka Amazon.in nung talitsü asoshi angutsü. Maneni

OnePlus 5 invite code alirtemi OnePlusStore.in nungi iba phone alitettsü.

Tanga specification tem rongnung OnePlus 5 nung Snapdragon 835 processor den 1080P Full HD resolution densema 5.5-inch AMOLED display keta lir. Iba phone nung 2.5D Corning Gorilla Glass 5 protection aser Android 7.1.1 Nougat keta lir. Phone nung battery tashiji 3,300 mAh alitsü

aser OnePlus' indang Dash-charging dena support asür.

Camera tsütsü reprangdangra OnePlus 5 nung tesülen camera 20-megapixel telephoto sensor dena 16-megapixel aser tejaklen camera f/2.0 aperture dena 16-megapixel sensor keta lir. Phone nung sim ana amshitetsü aser Bluetooth 5.0 aser LTE class connectivity-a support asür.

India nung tetsürtem indang Facebook atema sentong tasen ka yanglutsü

June 22, 2017 (Agencies): India nung tetsürtem temeden wazüka yutsütsü mechi Facebook ajanga sentong tasen ka yanglutsü metetdaksüogo aser iba sentong ajanga tetsürtem indang Facebook nung noksa inoka aliba tangari download asütsü atema kibur nungi temelaba agitsü.

"India nung tetsürtem indang noksa ya tangari agizüker temelaba melie pei molungba nung amshiba ajanga tetsürtem aikati tangar den noksa lemsateptsü memolungba onoki bushitetogo," ta Facebook Production Manager, Aarati Soman-i Facebook page nung metetdaksü.

India nung iba sentong tenzüka sülen maneni tanga linük nunga amshitsü.

Item noksa kümzüka ayutsü asoshi sentong tasenba ya Centre for Social Research, Learning Links Foundation, Breakthrough aser Youth Ki Awaaz amala India nung safety organization tem den külemi lungjemer yanglu.

"Facebook nung nüburtemi nü indang profile noksa download mesütettsü mesüra message ajanga tangar nem magütsütsü. Facebook nung

na medemer masüba nisung temi nü indang profile noksa nung shinga tag mesütettsü," ta Soman-i shisem.

Facebook nung aliba profile noksa ya tangari screenshot agiba nungi nokdangtsü asoshi yanglutsü aser iba feature ya Android phone tem nungbo keta lir.

Company ajanga item profile noksa nung 'blue border & shield' adoka sayatsü.

India nung akhi mapang nungi amshia aruba süoshi atakba mapang amshiba 'bandhni & kantha' design nungi ajizüka noksa balala agi nisungtem dang rasa-a ashir, Jessica Singh den külemi Facebook ajanga profile noksa nung inoka amshitsü sentong tasen ka yanglutsü.

"Mezüng tendangba ajanga profile noksa nung design layer ya inokba ajanga item noksa tem agizütsü asoshi shilem 75 agi tasakba kümdaksüba bushitet," ta Soman-isa shisem.

Iba noksa nung jangjatsü asoshi inoka aliba design ya tangari temelaba melie amshiba metetra noksa kibur-i Facebook nem osang agütsütsü aser Facebook ajanga iba noksa indoktsütsü, ta lai-sa shisem.



Cedar Rapids, June 22 : 2017, June 21 anogo Cedar Rapids, Iowa, U.S nung U.S tir atema nübuyim sentong ka nung o jembitsü aoba mapang US Tir, Donald Trump'er jabaso kinungtsü, Lara Trump-i la mashisa aliba sayuba mapang tangokba noksa nung angur.



Dimapur, June 22 (TYO): Nagaland Designer Association-i ayonga Nagaland Fashion Week 2017 Season-1 sentong ka Hotel Theja Fort nung June 22 anogo, nikongdang 5:00 ako nungi tenzükogo. Iba sentong nung Nagaland tesem balala nungi designer lanur aika adenshia shilem agitagi. Iba sentong nung desinger balala-i yangluba süoshi aser sübutsü tem sayatsü.

Happy Birthday

TENÜNG : PURSEN JAMIR (SUNGRATSÜ)

Tasoba anogo : June 23

Kum : 2

Talidak : Padumpukhuri, Dimapur

Tsü ngremer taochi nung jabaso tanü küm 2 abensaba anogo anema lia arishi tajung moatsüba asoshi Tsüngrem tenüng asanger. Maneni Tsüngremi arishi talang moajang ta sarasademtsür.

- Temeim tsürabur, oya Ajungla, otsü obou & kinungertem





New Delhi, June 22, 2017 : Brihostibarnü Parliament House library building, New Delhi nung Congress Party Tir, Sonia Gandhi leniba nung Opposition Party balala nungi lenirtemi linük Tir election onük nung senden ayonga amenba noksa nung angur.

India linük 2-4 degrees Celsius tatsükba akumtsüsa lir

New Delhi, June 22 (Agencies): 2015 küm India nung tali atsükba ajanga nisung 1,700 dak tema asüba indang kuli bushisüngdang scientist temi, küm 10 shia linük nung tali atsükba ajangshitsü aser 2-4 degree celcius tatsükba akumtsüa akok, ta metetdaksü.

Ano 2016 küm nungsa India linük tatsükta liasü. 1901 küm nungi tenzüka India linüki iba record asadanga arur. Ano maneni taküma kanga tsüka tenzükogo; March ita tatemlen tashi nungbo state 9 nung kanga

tsüka kümogo.

US Tir, Donald Trump-i 'alima tatsükba akumer' ta asüba ya yazü lir, aser iba ya US manufacturing jenjang mejungi kumdaksütsü atema lir, ta shia Paris Climate Agreement nungi atsüngadokogo.

Ajisüaka India linükiba alima tatsükba akümiba atema alima linüktem den teka amteper inyaksü nangzükogo.

Interview ka agidang Gujarat, Gandhinagar yimti nung aliba Indian Institute of Public Health Director, Dileep

Mavalankar-i, tali atsükba ya ajanga nisung merirjang aika tepsettsü akok, ajisüaka iba ya nokdangtetsü, ta ashi.

2014 küm Ahmedabad Municipal Corporation leniba nung South Asia linüktemi mezüngbuba Heat Action Plan tenzüka liasü.

"Nüburtem nem shisatsü agütsüba, tali atsüktsü indang jelia sangdongba aser nüburtem kümzüktsü atema inyakba mapatem ajanga tanga yimitem aser state temia iba sülen anidaksü," ta Mavalankar-i ashi.

Rajiv tepsetba ken o nung aija alir kati taochi agi pa tepsettsü mepishir

Chennai, June 22 (Agencies): Taoba mapang Ato kilonser, Rajiv Gandhi tepsetba ken o nung aija alir ka tesüiba küm 27 tashi tepoukdak lir, aser pai pa taochi agi tepsettsü mepishio, ta osang ka ajanga metetdaksü.

Bodhbarnü Robert Pious-i shidi ka ajanga Puzhal jail ketdangsertem dang, taochi agi pa tepsettsü mepishi.

Rajiv tepsetba ken o nung aija Robert Pious taküm piyong tepoukdak ayutsü obendang agüja liasü. Tamil Nadu state sorkariba iba ken o nung aija alir nisung tenetprongla chioktsü melunga lir, ajisüaka Supreme Court-i memelunger.

Robert-i züluba shidi dak sendakba nung police

ketdangser kari, "Pai züluba shidi atema onoki telemteba kecha agitsü makok. Onoki iba shidiji DGP office ajanga state home department nem agütsüogo. Iba temepishibaji Centre sorkari reprangtsü akok, iba den külemi iba ken o ya reprangshitsü atema Supreme Court matsüngdang benoka lir," ta metetdaksü.

1980s mapang nung Sri Lanka-i yokba Indian Peace Keeping Force (IPKF)-i Sri Lanka Tamil nunger, Pious'er chir tepset ta tai tonglokja pai Rajiv Gandhi tepsetba sentong yangluba nung shilem agi.

Rajiv tepsettsü atema sentong yangluba nung melung malemer tongti rongnung pa tenünga züngokba sülen pa taküm piyong tepoukdak ayutsü

obendang agüja liasü.

1991 küm May ita nung Rajiv Gandhi tepsetba ken o nung aija alir parnok tenetprongla tepoukdak nungi chioktsü atema Tamil Nadu sorkari telemteba agia liasü. Ajisüaka Supreme Court-i, Centre sorkar den masüngdangtepi state sorkari parnok chioktsü makok, ta metetdaksü.

Iba sülen state sorkari Supreme Court dang iba obendang reprangshitsü mepishi, ajisüaka iba temepishibaji tang tashi court nung anendaka lir.

Iba ken o nung aitsür parnok tenet rongnung Pious, A G Perarivalan, Jayakumar aser Ravichandran nunger taküm piyong tepoukdak ayutsü obendang agütsü.

Bank tem dang July 20 tashi nung sen tejen agütsütsü metetdaksü

New Delhi, June 22 (Agencies): Centre sorkari district cooperative bank tem, commercial bank tem aser post office tem nem maneni maongka agüja sen 500 aser 1,000 notes tejen July 20, 2017 nü tashi nungbosa Reserve Bank of India (RBI) nem agütsütsü metetdaksüogo.

Yaküm November 8, 2016 nü sorkari demonetisation sangdongba sülen sorkari commercial bank tem aser post office tem dang December 30, 2016 tashi nung nüburtem dang nungi sen notes tejen agizüktsü metetdakja liasü.

Ano District central cooperative bank tem nembo November 14 nü tashi dang mapang agüja liasü.

Tanü finance ministry-i sangdong ka ajanga yaküm December 30, 2017 anogo tashi nung agizükba sen notes tejentemji taruba ita, July 20,

2017 nü tashi nung RBI nem agüja melenzüktsü asoshi bank tem aser post office tem nem temelaba agütsü.

Cooperative bank temi sen tejentemji yaküm November 14 tashi nung agizükba dang süra parnok nema kasa maongkaji agütsür.

Sorkar ketdangser kati ashiba agi, Supreme Court dang tamalen nangzükba aliba nung ajemdaker banktem nem iba maongka agütsür.

Yaküm December ita nung sorkari Supreme Court dang, sen tejen notes ji RBI nem agütsütsü asoshi district cooperative bank tem nem kobi melii sangdong ka agütsütsü, ta metetdakja liasü.

Finance ministry sangdong nungsa, tamalen latetja aliba mapang nung item sen tejen magütsüba atema bank tem aser post office tem dang kuli meshitsü, ta shia lir.



Lucknow (Uttar Pradesh), June 22, 2017: Brihostibarnü Uttar Pradesh yimtiba, Lucknow nung nüburtemi yi nokdangtsü pusema ozulu balala amer jajaba noksa nung angur. Tawa Uttar Pradesh Excise Minister, Jai Pratap Singh-i, Supreme Court tetuyuba kübok state aser National highways nung aliba yi dokantem shibangtsür, ta metetdakja liasü. Supreme Court tetuyuba kübok state nung yi kibur 3,000-i yi ayokba licences meyipa agütsüogo.

J&K nung LeT telungpur 3 khaset

Srinagar, June 22 (Agencies): Yasüng nungi tenzüka South Kashmir, Pulwama district nung ghonda trok shi telungpur den raraa arur tanep züngia sepaitemi Lashkar-e-Taiba züngsem asem khasetogo.

Par asem rongnung nisung ka tenüng agi Majid Dar bo Kakapora nung sarpanch aser Pulwama district Tir tepsetba nung shilem agia lir, ta tanü police ketdangser kati metetdaksü.

Kiralongrar telok, Lashkar-e-Taiba nung adener lanur asem Kakapora tesem nung aliba osang lazükba sülen security sepaitemi yasüng iba tesem nung ki ka longbanga

liasü, ta ketdangserisa ashi.


Pulwama tesem nung telungpur aika lir, aser parnokji tema nung alirtemi nungitba ajanga parnok anema meinyakteter, ajisüaka tang mezüng iba tesem nung telungpur anema takok ngua inyakogo, ta paisa ashi.

Tawa Anantnag district kübok Arwin yim nung telungpur o sepai na tsüngda raradang sepaitemi LeT commander, Junaid Mattoo khaseta liasü, iba sülen anogo asem lir maneni par telok nungi züngsem asem khasetogo.

Yashia north Kashmir, Baramulla district kübok Sopore jila nung security sepaitem telungpur ana khaseta liasü.



Mumbai, June 22, 2017: Brihostibarnü Azad Maidan, Mumbai nung Gorkha nungeri Gorkhaland atema takhangba agüja longkak aitba noksa nung angur.



GST-i melenba mapang input tax credit mesamatsü.

GST-i melenba mapang nü indang input tem (junga merenem aliba osettsüset/ renemer aliba osettsüset amala) indang Input tax credit (ITC) kechi koma asütsü, ta shisabulur asü?

Temzüng ajanga nü indang input tax credit belentsü melar aser sentong tasen-i melenba mapang nü nindang ITC mesamatsü. Tsünglanglen table nung tejangja shia lir:-

S. No.	CATEGORY OF TAXPAYER	DETAILS TO BE PROVIDED	AMOUNT OF ITC AVAILABLE
1	Manufacturers and Service providers already registered under existing Central laws.	Closing balance of Central credit.	Closing balance of Central credit as per last return.
2	Manufacturers and Service providers already registered under existing Central laws.	Balance of un-availed Central credit on capital goods.	Amount of Central credit on Capital Goods not availed earlier.
3	Manufacturers and Service providers Supplying Exempted Goods / Services under existing laws (not liable to be registered under existing Central laws).	Stock of inputs (held as inputs / semi-finished goods / finished goods) to be used for making taxable supplies where duty paid invoices available.	Amount of duty paid as per available duty paid invoice.
4	Trader (not liable to be registered under existing Central laws).	Stock of inputs (held as inputs / semi-finished goods / finished goods) to be used for making taxable supplies where duty paid invoices available.	Amount of duty paid as per invoice details submitted.
5	Trader (not liable to be registered under existing Central laws).	Stock of inputs (held as inputs / semi-finished goods / finished goods) to be used for making taxable supplies where duty paid duty paid invoices not available.	<p>In case of intra-State supplies</p> <ul style="list-style-type: none"> • 80% of the Central tax paid (in case rate of total tax is 18% or 28%). • 40% of the Central tax paid (in case rate of total tax is 5% or 12%). <p>In case of inter-State supplies</p> <ul style="list-style-type: none"> • 30% of the integrated tax paid (in case rate of total tax is 18% or 28%). • 20% of the integrated tax paid (in case rate of total tax is 5% or 12%).

Form amshitsü tem: SI. No. 1 nungi 4 atema GST TRANS 1 Form amshitsüla, SI. No. 5 atema GST TRANS Form amshitsüla.

Item Form agütsütsü asoshi mapang: SI. No. 1 nungi 4 atema Form ya 30.09.2017 tashi nung agütsütsüla. Commissioner ajanga iba mapang anogo 90 tali atsülangtsü akok.

Form ka dak tali agütsütettsü akok.

SI. No. 5 atema form ya mezüngbuba ita trok shia ita tetemlen agütsütsü.

Nai item ajanga mangatetbatem asüngdangtsü akok:

- Help desk: cbecmitra_helpdesk@icegate.gov.in ; 18001200232
- Help desk: helpdesk@gst.gov.in ; 01244688999
- Twitter handle @askGST_GOI and @GSTN_IT



Tweet us at @askGST_GOI for any GST related query



Central Board of Excise and Customs &
Commercial Taxes Departments of States/Union Territories
www.cbec.gov.in

Afghanistan nung bank ka anasa nisung 29 pokset

Lashkar Gah, June 22 (Agencies): Brehostibarnü southern Afghanistan nung aliba Helmand province yimtiba, Lashkar Gah indang bank ka kima gari nung bomb inoker pokdaksüba lendong nung nisung 29 asü, ta Helmand province indang angh-i ashi.

New Kabul Bank kima iba bomb lendong nung nisung 60 yiru aser item yirur aliba ya timba civilian dang lir, ta Hayallah Hayat-i ashi.

Iba bank anasa civilian aser mitkartem kar itasen agizüksü atatepa aliba mapang anüngdang 12:00 ako (08:00 GMT) meta iba bomb tesashi ya apok, ta angh indang odongtar, Omar Zwak-ia ashi.

Iba bomba apokba ajanga gari aika mashileni mükep aser iba tesem nungi anüngleni mokozü atu. Muslim nunger temeshi ita, Ramadan tembangba anogo, Eid atongtsü anasa iba bank nung nisung aika adenshia sen agizüker, ta osang ajanga ashir.

Bomb apokba mapang iba bank telung nung Afghan National Army nungi züngsem aika liasü, ta osang ajanga ashi.

Lendong adalokba tesem nungi Ambulance aser nija indang gari nung yirur aliba nisungtem ya mozüki-i bener ao.

Iba osang züluba mapang tashi nung lendong agütsüba tenüng agir telok kata meliasü.

New Kabul Bank ya tamalena amaksü merang, kechiyong iba bank nungi mitkartem nem itasen agütsür, ta osangbener ajanga ashi.

Taoba ita Gardez yimti nung

aliba bank ka telungpur temi amak, aser iba lendong nung nisung asem asü aser aika yirua liasü.

February ita nunga kasa Lashkar Gah tesem nung aliba bank ka kima Afghan mitkartem itasen agizüksü nokdanga aliba mapang Taliban telok nungi züngsem kati gari ka nung bomb inoker pokdaksü aser iba mapang nisung trok tepset aser aika yiru.

Helmand nung aliba district 14 nungi district 10 bo Taliban

kübok lir.

April ita tatemlen nungi Muslim nunger temeshi ita tenzükbä mapang nungi Taliban teloki Afghanistan nung mitkar aser police tem maka lendong agüja arudagi.

Afghanistan nung Taliban telok makdoka sorkar tenzükbä nung yaritsü asoshi US mitkar 8,400 aser NATO nungi mitkar 5,000 Afghanistan nung lir aser US-i anu mitkar tali yoksemsü, ta osang angashir.

OFFICE OF THE AO STUDENTS' UNION, CHANGTONGYA TOWN DIST. MOKOKCHUNG, NAGALAND **SANGDONGER**

Ao Students' Union, Changtongya Town Golden Jubilee (1992-2017) benjungmong nungdem nung FREE COACHING FOR CLASS 10 STUDENTS IN MATHS & ENGLISH SUBJECTS agütsür.

Sentong Tongmelang Yamai Asütsü:

Anogo : 26th June-10th July 2017

Venue : CSHSS, CTN (Arogo School)

Shirnoksa atentsü: CTN Town Area School nung azüngertem aser Town chirtem sodi arua aliba mapang tejangrartem atentsü.

NOTE :

1. 26th June 2017 (Mon) 2:00 PM tatentsüpurtem aser tejangrartem ajak Registration agütsü.
2. Timing & Routine tejangja mapang tatong nung metetdaksütsü.

**Sd-
Imkongwapang
President**

**Sd-
Temsumongla
General Secretary**

OFFICE OF THE SENSOLIKUM VILLAGE COUNCIL

Dist. Dimapur, Nagaland

Dated 21st June 2017.

LOKTI INDI SENDEN JAZÜKER

Sensolikum mezüng lokti tentetpur (1st group) indi senden mongdang tan honibar 24th June 2017 anepdang 9:00 ako nungi Industrial Estate Old complex besides CRPF Gate nung akatsü. Anungji züngsem ajak nübo medemtepa mapang shidak nung arua adentsü ayongzüker.

Iba osang kaket nung sangdongba dak alaka kecha osang balaka shinga nem magütsütsü. Sendeni marur takang sen 500/- alitsü.

**Sd/- S. Bendang Ao
Chairman
Sensolikum Village Council**

**Sd/- S. Chuba Tzudir
Secretary
Sensolikum Village Council
M/Ph. 9436006755**

No.1401110112016-P&C GOVERNMENT OF INDIA MINISTRY OF INFORMATION AND BROADCASTING SONG AND DRAMA DIVISION

Subject: North Eastern States nungi aruba private cultural troupes aser individual artists dang Registration fees magütsü.

Tamalen Song & Drama Division nung private Cultural troupe registration/ empanelment atema advertisement adokba indang maneni agütsür. North Eastern State-tem Arunachal Pradesh, Assam, Mizoram, Meghalaya, Manipur, Nagaland, Sikkim aser Tripura nungi private cultural troupes aser individual ajak dang Government of India-i parnok dang nungi Song & Drama Division nung registration / empanelment asoshi "REGISTRATION FEES" kecha magütsü lemtetogo ta metetdaksür. Application agütsütsüba tesüsäba anogoji 25th July, 2017 alitsü.

**Sd-
Director
Song and Drama Division**

davp 22207/11/0007/1718

Public Awareness on

DDT



DDT ya ki temalen arakba mozü lir aser iba yagi merila kanga junga samatsür.

DDT ya kimalen (outside) nung maraktsüla.

DDT kimalen arakba ya temang atema lendong lir. Iba mozü ya ali nung mesamai küm aika alir.

Kodanga DDT ya alu nung shiruru tila tepsettsü atema tamshi, kechiyong iba jagi cancer aser tekolok nung timtem adoktsü aser tanur junga mebentettsü.



Issued by
Directorate of Health & Family Welfare Nagaland
National Vector Borne Disease Control Programme



AJEMALU TEBU ASÜR NOKMALEMBÄ (LONGSA) 23.06.2017

Akümlü nung amatsü makokba temeim oba, nai onok toktsür kotaker den lisemer joko küm 10 süia oaka, nai sayuba mapa tajung onok nüklai arua bilemteter.

Tanü na onok rongnung meliaka, nü tsüngnep nung jajadar aser jajatsü onoki pangjemer.

Asenok ajak kotak lima nung ajurutsü onoki sarasademer.

**Jala, Jabaso, Semchir,
Anükapang aser Pusem**



Sür küm ka ajungba anogo



**Asür Imnatuba Tzudir (Yimjenkimong)
Tasüba anogo : 23-06-2016**

Nai onok toktsür tanü küm ka abensar, saka onok den ali ama na bilemteter. Tasübai ali taküm tembangdaksür, Saka na ajungba indang bilemtetba ozü mulungjang nungi shingai rakzüka bener moutet. Na ajemalu, tesüngjem, temeim onoki teti menungra-a bilemer. Nai inyaktetba mapatem onoki amatsü makok. Onoki teti na kanga longrar.

Temeim Kinungtsü, Jabaso aser Kinungertem.

GOVERNMENT OF NAGALAND DIRECTORATE OF HEALTH & FAMILY WELFARE NAGALAND : KOHIMA

No. DHFW-5/23/TRG-NSG/2017/

Dated, Kohima the 22nd June 2017.

ADVERTISEMENT

Application are hereby invited from local intending female candidates for undergoing Training in Female Health Worker (FHW) for the session 2017-18 at ANM Training School, District Hospital Tuensang, Nagaland as indicated below.

1. Minimum and maximum age for admission will be 17 - 35 years on or before 31st Dec. 2017.
2. Student shall be Medically Fit, Medical Fitness Certificate to be attached from Government Medical Officer.
3. Application Form duly filled up along with necessary documents and 3 Nos of passport photos duly attested by Gazetted Officer may be submitted along with the Schedule Tribe and Indigenous Inhabitant Certificate which is compulsory for all, while submitting the form.
4. Original Educational qualification/documents should be produced before the interview board as and when called for.
5. No separate calling letter will be issued.
6. Issue of Application form - 27th June to 20th July 2017.
7. Last date of submission of forms - 4th Aug. 2017.
8. Issue of Admit Card - 17th Aug. to 24th Aug. 2017.
9. Date of written test - 31st Aug. 2017 (Morning)
10. Venue of written test - NPSC Hall, Kohima.
11. Date of Oral/ Interview - 8th Sept. 2017.
12. Venue of Oral/ Interview
13. Course details -

- A. (FHW)
 - i. Unmarried Female candidates.
 - ii. Two years course, 30 (Thirty) seats.
 - iii. Qualification - 10+2 any stream.

Forms will be available during Office hour at the Directorate of Health & Family Welfare (Room No.210) at the cost of ` . 100/- only.

**SD/- DR. N. BENDANGYANGER JAMIR
Director & HOD
Dte. of Health & Family Welfare
Nagaland, Kohima.**

Issued by: DIPR

Indian footballer temi Mizoram tzümetzung atema teyari agütsütsü



Football Players Association of India (FPAI) aser Mizoram XI na I-League champion Aizwal FC's home ground nung July 1 nü charity match ka asayatsü. FPAI pur noksa nung angur.

Mumbai, June 22 (Agencies): Tawa India nung football renloka aotsüba ren nung kanga bulua jempitepa arudar aser iba nung I-League aser Indian Super League (ISL) na ka küma longjemtsüba kanga sashia jembidar.

All India Football Federation pur India football tarutsü asoshi kanga mazüngi sentong yangluba mapang ka nung Indian defender Nirmal Chettri-i Facebook ajanga Darjeeling nung tawa mepetmesü adoka nisung asem tashi asüba dak sendakba nung pa tebilemba

Maneni Jayesh Rane aser Ashutosh Mehta natia Mizoram tzümetzung nung takoksa ajururtem atema teyari agütsütsü asoshi 'crowd funding campaign' ka tenzükogo.

Ajisüaka iba otsü ya idaki metembanger. Football Players Association of India (FPAI), kong asayar asemprongla ya dena lir, parnoki Mizoram XI den I-League champion Aizwal FC home ground nung July 1 nü charity match ka asayatsü.

Iba asaya nung ajangtetba sen ajak Mizoram tzümetzung

lemsetepogo. Iba kongshia timtema alirtem nem agütsütsü. Iba lendong nung tang tashi nung nisung 10 bo süogo.

Football Players Association of India-i iba osang Twitter ajanga sangdonga liasü.

Onoki Mizoram FA XI den asaya ka asayatsü aser iba asaya nungi ajangtetba sen tem tzümetzung agi kongshia timtema alirtem nem agütsütsü, ta parnoki metetdaksü.

Mizoram FA XI nung I-League akoker telok Aizwal FC nungi nüngtugu asayar kar densema asayatsü imlar.

Sindhu, Srikanth, Praneeth Quarters tongogo

Sydney, June 22 (Agencies): Brehostibarnü Australian Super Series badminton asaya tanabuba round nung Kidambi Srikanth aser B Sai Praneeth napronglai tena tata asaya koka quarterfinal tongtetogo. Quarterfinal asaya nung tena asayatsü.

Tetsür kicha asaya nung Olympic silver medallist P V Sindhu-a tanabuba round asaya nung China tsür Chen Xiaoxin straight set nung koka quarterfinal tongtetogo.

Srikanth shibai taoba hopta Indonesia Open semifinal nung Son Wan Ho koka liasü pai maneni Korea nunger World No. 1 ya iba asayamong nunga 15-21 21-13 21-13 agi minute 57 agia kokogo.

Tebur kicha asaya tanga ka nung Sai Praneeth-i kanga meranga asayar 21-15 18-21 21-13 agi China nunger asayar Huang Yuxiang madak takok

angu. Iba asaya minute 64 agia asaya.

Srikanth o Praneeth na April ita Singapore Open final nung asayaogo aser iba asaya Praneeth-i koka liasü.

Tetsür kicha asaya nung fifth seed Sindhu-i Chen 21-13 21-18 agi akok. La taruba asaya Thailand tsür Ratchanok Intanon mesera Chinese Taipei tsür World No. 1 aser top seed Tai Tzu Ying den asayatsü.

Tetsür tarep asaya nung Ashwini Ponnappa aser N Sikki Reddy na kanga meranga asayar 21-18 18-21 13-21 agi Japan tsür Shiho Tanaka aser Koharu Yonemoto nati tsükdaksüogo.

Tebur tarep asaya nung India nunger asayar Satwiksairaj Rankireddy aser Chirag Shetty nata tsükogo. Tena Chines Taipei nunger asayar Chen Hung Ling aser Wang Chi-Lin nati 16-21 18-21 agi akok.

LKM Foundation anogo...

Award angurtem rongnungi Lipokmenla-ia tatsüka jembidang, lai iba award ngutetba ya la kija agi meranga azüngbayong masü saka tsürabur mim tamang sarasadem aser Tsüngremi agütsüba sempet angateta tesayurtemi nendaka meranga sayuba ajanga dang lir

ta shia liasü. Imtisingkum Lemtur, LKM General Secretary-i ketdangsüa aniba sentong nungsa Supongmatong, LKM Treasury-i sentong moaja sarasadem aser Innakika Jamir, LKM President; Imkongwati AKM President; Ao Sanen Pongen Chuchuyimlang

(TAPAK 1 NUNGI...)

Village Council Chairman; I.Temsumangyang LKM Advisor nungertemia shilem agia jembiba den Unger students Union ajanga ken tena telok ayongzük aser Rww. Temjen Chuchu Town Baptist Arogo sannüker-i kaketshirtem atema alakteta sarasademtsü.

Congress-i aniba opposition-i Tir...

2004 küm la Manmohan Singh-i aniba UPA sorkar cabinet nung shima Social Justice & Empowerment minister akum. Iba sülen 2009 küm la Water Resources Union Minister inyaka liasü.

Ponguben tashi MP inyakla, Kumar ya tetsür rongnung mezüngbuba Lok Sabha Speaker shima 2009 nungi 2014 küm tashi inyaka liasü. La ya lawyer ka lir.

Tanü Parliament House, New Delhi nung Sonia leniba nung opposition party tem senden ka amenba mapang party 17 nungi lenirtemi iba telemtetba agia liasü.

Tanü iba senden nung

Congress tongti, Sonia den tongtibang lenirtem rongnung taoba Ato kilonser, Manmohan Singh, Congress lenirtem-Ghulam Nabi Azad, Mallikarjun Kharge aser Ahmed Patel, NCP lenir, Sharad Pawar aser RJD tongti lenir, Lalu Prasad Yadav nunger densema liasü.

Ano Left lenirtem rongnungi Sitaram Yechury aser D Raja, DMK nungi Kanimozhi aser National Conference lenir, Omar Abdullah nungera liasü.

May 26, 2017 nü opposition party tem senden nung Trinamool Congress lenir, Mamata Banerjee, BSP lenir, Mayawati aser SP lenir, Akhilesh Yadav nunger dena liasü, ajisüaka tanübo

parnok iba senden nung medentet, saka parnok melen tanga lenirtem yok.

Ano iba senden nungsa JD-S, RSP, JMM, Kerala Congress, RLD, IUML aser AIUDF lenirtema dena liasü.

JD(U)-ibo BJP-i shimba Tir candidate, Ram Nath Kovind nungitsü sangdongogo.

Tir election nung opposition party tem longjemer candidate ka shimtsü atema JD(U) tongti lenir aser Bihar Chief Minister, Nitish Kumar-i ayongmesoa iba maparen tenzük liasü, ajisüaka ajungbena yashi par party-i BJP-i shimba candidate ang pusemstü sangdongba ajanga aika aoksadaksüogo.

(TAPAK 1 NUNGI...)

Nagaland nung election timi agitsü atema yimten...

Parnokisa election mapang yi mamshitsü, election camp memesemtsü, party office aser candidate ki dak alaka ki kecha nunga party flag masongtsü, lokti chiyonga mamongtsü, procession maotsü aser tashiyim amshia shingai shinga amokmemerentsü ta tenangzükba agiogo.

Ano, Nagaland nung yimten

telokisa NBCC tsüngdang Tsüngrem tenung nung election mapang telongpur amshia tashiyim mapa meinyaktsü, election manifesto tejangja alitsü, ki sema vote yima mesenzütsü, NBCC teyuba nung anidaksüsa party workers ajak azüoktsü, olulu meproksü, tashiyim agi vote enoktsütsü memerangtsü aser nübertem asoshi yimjung,

ochi aser terenlok atema inyaktsü nangzük.

Election mapang Clean Election Committee-i ayongzükba "Common Platforms" nung shilem agitsü aser NBCC-CEC Guidelines ajak nung mapa küma anidaksü nangzükker ta yimten telok troki NBCC den Tsüngrem tenung nung tenangzükba agiogo.

Mezüngbuba Kohima district inter-school football tournament asayatsü



Kohime, June 22 (TYO): Royal Club Kohima aser School education department külemi lungjemer Kohima Local Ground nung June 26 nungi July 15 tashi mezüngbuba Kohima district inter-school football tournament 2017 asayatsü.

Iba tournament nung kakat reju 24 nungi shilem agitsü, aser asaya ya 'knock out' yimya nung asayatsü, ta iba asayamong osang metetdaksüdag, Royal Club tir, Er. Kevizatuo Miachieo-i osangbener dang ashi.

Iba asayamong nung champion nem sempet sen 70,000, runners up nem sen 50,000 agütsütsü aser semi final nung tamakok alur shia nem sen 20,000 agütsütsü.

Iba asayamong nung shilem agir telok ajunga nem match allowance sen 1000 agütsütsü, ta sangdong ajanga ashi.

Iba asayamong North Field, Vinyiizo School, Mt. Sinai HSS, Bethel HSS, St. Peter School,

Charity School, Naga Bazar Baptist, BMS Jotsoma, St. Mary's HSS, Vineyard, Azedon, G. Rio School, Mezbur HSS, Model HSS, MHBHSS, TMGHSS, Khedi Baptist HSS, Stella HSS, Chandmari HSS, Mt. Hermon HSS, BHS Tseminyu, Riiziikhrie HSS, Baptist High aser Dainty Buds kakat reju tem nungi shilem agitsü.

State nung football asaya ajungkettsü asoshi Royal Club Kohima ajanga 1988 küm nungi tenzük sentong balala ayonga arudagi.

Iba asayamong dak sendakba maparen aser temzüng ozüng amala yimya balala tesayuba agütsütsü asoshi 2017, June 25, nikongdang 4:00 ako nungi tenzük sentong ka agitsü. Anungji asayamong nung shilem agitsüper telok nungi adentsü asoshi kasa sangdong ajanga metetdaksü.

BILEMDANGANG

"Taküm ya kanga tongmelang lir, saka asen sasa benjadaksür".